

Protocol no. 80**Sezzüda da lündeschdi, 22 november 2010, 20.00 – 23.05**

Preschaints: Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Rico Zini (protocol)
Men Luppi (tractanda 713)

Protocol

Il protocol no. 79 da la sezzüda dals 15 november 2010 vain approvà.

713 3**CULTURA E TEMP LIBER****Film – „Wiesen in den Bergen – Sent“ – Credit fr. 3'500.--**

Il president da la meglioraziun, Men Luppi, orientescha al Cussagl cumünal ch'el haja survgni ün film dals ons 80 sur da Sent cun sia vegetaziun e seis cuntornns. Il film düra raduond 50 minuts. Il film es registrà sün rollas ed ün büro specialisà til elavura e til restaurescha per metter sün DVD. Men Luppi manaja cha'l film sün quistas rollas tockess al cumün per til archivar. Davo avair vis ün muoster da ca. 15 minuts conceda il Cussagl cumünal ün credit da fr. 3'500.-- per til laschar restaurar, registrar e per far 50 copchas las qualas pon gnir vendüdas a personas interessadas. Il Cussagl cumünal ingrazcha a sar Men per sia sporta e per la spiegaziun.

714 021**FABRICA****Decret dal Cussagl cumünal**

Il Cussagl cumünal repassa il decret preparà da la cumischiun da fabrica a regard las fabricas in cumün. Il decret regla il seguaint:

1. Temps da fabrica
2. Adöver dal terrain public per meras privatas
3. Serradas da via

Il Cussagl cumünal decida d'introdüer a partir da subit il decret, rimplazzond quel dals 15 mai 2006.

Quist decret vain aggiunt a mincha permiss da fabrica e vain declerà sco part integrala da tal.

715 011.300 Radunanzas, revisiun da quints e votumaziuns
Votumaziun cumünala dals 28 november 2010

Il capo orientescha ch'el haja tut incunter la proposta da la „GI per ün cumün viv ed activ“ ch'inchün dad els less gnir a güdar a dombrar oura las vuschs da la votumaziun cumünala. Il Cussagl cumünal ha interpretà quai in quel sen chi muossa üna gronda disfiduzcha invers las instanzas cumünalas ed eir invers l'administraziun cumünala. Il Cussagl es fich dischillus da quai. Il Cussagl cumünal decida da na entrar sün quella proposta e da dumandar percunter a la cumischiun sindicatoria da far üna controlla. Ultra da quai remarcha il Cussagl cumünal cha'ls placats cunter la ledscha sajan in plüs lös gnüts pichats oura sainza permiss e cun quai fat abüs dal spazi public.

716 9 FINANZAS ED IMPOSTAS
Preventiv d'investiziuns 2011

Il Cussagl cumünal repassa las investiziuns previssas pel 2011. Il total da las investiziuns es fich grond. Illa prossma sezzüda dal preventiv chi ha lö als 29 november 2011 vegnan quellas discutadas culla cumischiun sindicatoria.

L'actuar: